

MEDA DAU VAKAVINAVINKA

(Vakarautaka ko Rev. Dr. Ilaitia S. Tuwere).

“Ia na dra ena kemudou ivakatakilakila ena veivale dou sa tiko kina: ia niu sa raica na dra, kau na qai lako siviti kemudou, ena sega ni yacovi kemudou edua na ka mo dou rusa kina, niu sa yavita na vanua ko Ijipita” (Lako Yani 12: 13).

“Ia me lewa sara na lomamudou na Vakacegu i Karisito, ni dou sa kacivi ki na ka oqo, ni dou sa yago e dua bauga: ia mo dou ia tiko na vakavinavinaka” (Kolosa 3:15).

Na Vakavinavinaka sa ikoya na kena cakacakataki, se kena bulataki na “vinaka”. Sa yavu levu se tina ni ‘vinaka’ kecega na Kalou. Meda dau vakavinavinaka vua ena veisiga ni noda bula. Meda vakavinavinakataki Koya ni tekivu me dolavi vei keda edua na tikina ena pepa oqo ni lotu eke e Niusiladi meda veirogoci se veiwasei kina. Na Vakavinavinaka sa itovo tudei ni noda bula vakavanua mai Viti. Ni cabo edua na magiti, era dau kaya na vakacabora mai...*mo dou moli, me keitou moli... noda vata na bula vinaka.*

Sa “uto” ni veiqaravi kecega e va-Kalou se va-Karisito na *Vakavinavinaka*. Segale tale e vinaka ka vinaka vakaoti, na Kalou duaduaga, kei Jisu Karisito na Luvena. Sa itovo tudei ena loma ni Vuale va-Kalou me bulataki kina na Vinaka oqo ena nodrau bula na Kalou na Tama kei na Kalou na Luvena, ena icegu Bula ni Kalou na Yalo Tabu.

Ni da ciqoma me noda itovo tudei ena yabaki oqo kei na bula oqo na “vakavinavinaka” eda sa vakamurimuri ira tiko na lewe ilomalagi ena nodra vakavinavinaka vua na Kalou, ka ra taleva tiko kina na qaqa ni sere eda dau cavuta ena gauna eso ni noda lotu: *E dodonu, e dodonu, e dodonu...na Kalou.* Na veibasai ni ‘vakavinavinaka’ eda kila raraba sa ikoya na vosa vakacacataka edua tale ka wekamu ga. Na kakase, se sa levu ga na noda “complain” tiko. Eda sa sureti tiko ena yabaki vou oqo me sa noda iyau tudei na ‘vakavinavinaka’.

Basika rawa na Vakavinavinaka ni da NANUMA LESU edua na ka. Sa bibi na noda dau vakananuma lesu eso na ka eda a sotava mai. Na loloma mai vale se dua ga na vanua eda nanuma lesu ena noda qaravi voli ena noda tubu cake mai. Ia sa “tina” ni ka kecega meda nanuma lesu sa ikoya na Nona cakacaka loloma na Kalou ena noda bula. Na cakacaka loloma oqori sa vakatakarakarataki ena i Vakayakavi ni Turaga eda dau sureti kina mai Valenilotu ena veigauna ni lotu. Au nuitaka ni da sotava taucoko ena itekivu ni yabaki oqo ena noda lotu ni Veiyalayalati.

Sa i ‘Vakayakavi’ ka vakarautaka na Turaga ko Jisu. Segale ni katalau se ivakasigalevu; se ‘morning tea’ se ‘afternoon tea’. Ni vakayacani me ivakayakavi, sa “ivaqa” ni vakarau meda curuma yani na ‘bogi’. Na “bogi” oqo sa sega walega ni gauna “buto” ia na veigauna tawa kilai se dredre kecega sa tu mai liu eda na sota kaya ena noda bula. Segale ni dua e vakavo kina. Eda sotava taucoko. Oqori na ibalebale ni “Vakayakavi” ni Turaga.

Sa vakatokai taumada me “Kana Vata ni Lako Sivia” ka da rogoca ena Lako Yani. E “lako sivita” na agilosu ni Kalou na nodra vale na Iperiu ni raica ni “boro” tu na kena duru ni katuba ena dra ni lami. Vakananuma mada na nomu “lako sivia” eso na ka ena nomu bula ko vakabulai mai kina se sotava. Sa ivakatakilakila levu na DRA. Na Dra na Bula; na Bula na Dra. Nona Dra tawacala na Luve ni Kalou ka volai vinaka koto kina na Nona vosa ni yalayala ni na maroroi iko ka tu vakarau me tomani iko ena yabaki oqo kei na veigauna kecega; kevaka walega ko golevi Koya ka tauri Koya mo drau bula vata, cakacaka vata ka sala vata ena yabaki vou oqo.

Na Vakavinavinaka sa ‘wai ni mate’ vinaka duadua. Meda gunuva tiko ni bera ni da tekivu taka na noda vuli se cakacaka ena veisiga. Meda vakatawana na noda qaqa ni masu ena itekivu ni veisiga ena Vakavinavinaka vua na noda Kalou. Meda bulataka na nona Vinaka na Kalou ena noda vakavinavinakataka beka edua na wekamu se vakaukauwataka beka edua ka yacovi koya edua na ka dredre. Meda saga ena yabaki oqo meda ivurevure ni marau ka ivurevure ni kaukauwa ena loma ni noda ivavakoso lotu se vanua ni cakacaka.

Sa taleitaka vakalevu na Kalou meda bula-lako voli ena Vakavinavinaka. Ka ni sa iyau levu ka maroroi vinaka koto ena loma ni Vuvale va-Kalou. Na kena lotu e cavuta ko Paula ni: “Sa iyau levu na lotu kei na loma vinaka.” Me kakua ni vakavosa walega. Me vakayacori, bulataki se cakacakataka na noda Vakavinavinaka vua na Kalou. Meda nanuma tiko na italanoa ka koto ena ivola nei Luke: *“A sa vosa ko Jisu ka kaya: Era sega li lewe tini sa vakasavasavataki? Ia sa evei na lewe ciwa? Sa sega ni dua me lesu mai me vakarokorokotaka na Kalou, ko koya duaduaga na kai tani oqo”* (Luke 17:17).
